



24.10.2022

UKA2022/76

Paneeraq Olsen, Naleraq

Tasiilami innuttaasut suliffeqanngitsut paaqqinninnermi isumassuinermillu immikkoortortaqarfimmi sulilersinnaanissaannut qaffassaanissamut immikkut suliaqartussanik pilersitsinissamut Naalackersuisut peqquneqarnissaannik Inatsisartut aalajangiiffigisassaattut siunnersuut. Immikkut suliaqarnissaq sukkanerpaamik aallarnisarneqassaaq nunarpullu tamakkerlugu atuutilersinneqarnissaa siunertaralugu ataavartumik nalilersorneqartassalluni.

(Inatsisartunut Ilaasortaq Anna Wangenheim, Demokraatit)

Siullermeerneqarnera:

Siunnersuuteqartumut Inatsisartunut Ilaasortamut Anna Wangenheim, Demokraatit Naleqqamingaannit qujavugut.

Naalackersuisut akissuteqaamminni siunnersuuteqartup siunnersuutaannut ilaatigut imatut allapput: ”Sinaakkutit maleruagassat malillugit pineqartut nalinginnaasunut piginnaasanik ineriartortitsiviusumik pikkorissaanernut ilaasinnaatitaareerput, kisiannili misilittakkanik aalajangiiffigitinnertalimik pikkorissaanernut ilaasinnaatitaanatik.” Tasiilami suliffissaaleqisut qiviaraanni Nunatsinni Naatsersueqqissaartarfiup kisitsisaataani takuneqarsinaavoq Tasiilami suliffissaaleqisut maajimi 234-iusut nunatsinni inuttussutsimut sanilliukkaanni nunatsinni suliffissaaleqinerpaaffiulluni. Taamaattumik Naalackersuisut allakkaluartut piginnaasanik ineriartortiffiusumik pikkorissaanernut ilaagaluartut suli ulloq manna tikillugu iluatsitsiviusimannigilaq.

Aamma Naalackersuisut allapput Naalackersuisooqarfiit akimortumik suleqatigiisitaliorlutik Tasiilami suliniuteqartut. Naleqqamit naalackersuisooqataagattali suliniutit aallartimmata suliniutit masakkut sumut killinnersut paaserusunnarpoq aammalu Kommuneqarfik Sermersooq suleqatigineqarnerpoq. Suliffissaaleqineq annertummat suligasuarneq piaarnerusumik iluaqutaanerumillu kinguneqarnissaanik kissaatiginarpoq piffissami qanittumi tusagaqassalluta.



Siunnersuuteqartup Anna Wangenheim-ip siunnersuutaani soqutigaarput misissuinermini Qallunaat Nunaani misilittagaalereersimasoq ilanngussamilu takuneqarsinnaasumi, inuusuttut utoqqaat angerlarsimaffiini sulilersinneqarsimasut paaqqutarinninnermiunngitsoq kisianni utoqqarnik susassaqartitsisinerni aliikkusersuinernilu aammalu nerinerini sulisinneqarmata sulinnermut sulisunut allanut paaqqutarinninnermik isumassuinermillu suliaqartunik oqilisaataaqalutik. Qallunaat Nunaanni kommunit 23-iusut tamanna atugarilersimavaat inuusuttullu utoqqaat illuini utoqqarnillu sullissinnermut soqutiginninnerulernissaanik aqqustissiuuullutik. Naleqqamiit isumaqarpugut taama ittunut misilitaanermut assingusumik Naalakkersuisut misileraanissamik siunnersuummut tapersiisariaqaraluartut. Iami naluneqanngitsutut nunarput tamakkerlugu utoqqaat illuini sulisussaaleqineq annertummat.

Naleqqamiit isumaqarpugut sumiiffinni pisinnaasat aallaavigalugit sumiiffimmilu inuttaasut suleqatigilluinnarlugit aqqissuuisoqartariaqartoq. Naalakkersuisut akissutiminni aamma allapput: ”tarnikkut nappaatilinnik peqqissaanermi tapersersortinut misilittakkanik naliliiffigitinnertalimmik pikkorissaanermi iluatsinneqarpoq Tasiilameersunik pikkorissartoqarnera.” tamanna qujanaraluartoq kisianni pikkorissartoqarpoq sumiiffitsik qimallugu, kissaatiginarnerugualarpoq sumiiffiini pikkorissaaneq ingerlanneqassasoq, taamaaliornikkut sapinngisamik amerlanerpaat nunaqarfimmiillu peqataasoqarsinnaammat. Pisarialerujussuuvormi utoqqartatta inulerinermi sullissisut paaqqutarinnittut isumassuisunillu ilinniarsimasunik sullinneqarnissaat sapinngisamik utoqqartatta utoqqalinerminni toqqussillutik ataqqineqarlutillu paaqqutarineqarnissaat.

Taamatut oqaaseqarluta Naleqqaminngaaniit Naalakkersuisut allannguutissatut siunnersuutaat taperserparput ataatsimiititaliamullu ingerlatinneqarnissaa kissaatigalugu.